

UDIN SEDE DAL PRIN CAMPUS EUROPEAN SU LIS POLITICHIS LINGUISTICHIS

In Setembar i plui grancj esperts dal NPLD si dan adun in citât.

Si davuelzarà a Udin ai 13 e ai 14 di Setembar dal 2018, il prin NPLD – Coppieters Campus, il gnûf progjet targât Network to promote linguistic diversity. Il Friûl al ospitarà i docents

plui impuartants e i esperts a nivel mondiâl su lis politichis linguistiche europeanis. La iniziative, risultât de sinergie jenfri Agenzie Regjonâl pe Lenghe Furlane e NPLD, e à vût il patrocin impuartant e il finanziament de Fondazione Coppieters di Bruxelles, specializade in federalism e politichis linguistiche, e e viodarà la partecipazion di rapresentants dal Consei de Europe e de Comission europeane. In grazie de colaborazion cu la Universitât dal Friûl, i incuintris si davuelzaran inte sede de Scuele Superiori, drenti dal prestigjôs Palaç dal Sietcent Toppo Wassermann.

L'NPLD al è l'organisim cun sede a Bruxelles, atîf intal setôr de politiche e de planificazion linguistiche, constituît di divers ents regjonâi e statâi che a fasin par de Union europeane. La rêt, cofinanziade de Comission europeane, e je stade creade par sostignî, tutelâ e promovi lis lenghis minoritariis e regjonâls a nivel european. Il so obietîf primari al è chel di incressi la cussience, a nivel internazionâl, su la impuartance de diversitât linguistiche, valorizantle tant che oportunitât e strument clâf pal disvilup personâl, sociâl e economic de Europe e dai siei citadins, in plui che di favorî il dialic interculturâl tra i citadins europeans. La rêt e da vôs aes comunitâts linguistiche che le componin e che a vivin intune situazion di debilece.

Inte pratiche, NPLD al met in evidence lis cuistions linguistiche tal ordin dal dî dal Parlament european, de Comission e dal Consei european; al inzorne lis istituzions europeanis su lis politichis linguistiche che a integnin lis lenghis regjonâls e minoritariis; al promôf lis buinis pratiche e lis colaborazions in merit ae politiche linguistiche, organizant events e grups di lavôr par supuartâ la creazion di progjets linguistics condividûts tra i components.

Il Consei regjonâl de Regjon Friûl-Vignesie Julie al è jentrât in cheste rêt impuartante zaromai tal mêis di Lui dal 2014, e al è une des pocjis assembleis legjislativis drenti tal Network. Chest al marche la atenzion de amministrazion regjonâl pes lenghis minoritariis. Il rûl operatîf di gestione, organizazion e supuart ae Regjon intes ativitâts dal NPLD i è stât dât ae ARLeF, che intai agns e à cjapât part in maniere simpri plui ative aes iniziativis organizadis de rêt in Europe. Par vê plui informazions si pues cjalâ il sît www.npld.eu o la pagjine Facebook dedicade "NPLDeu".

Pagjine par cure de ARLeF -
Agenzie Regjonâl pe Lenghe Furlane

ARLeF
^^
AGENZIE
REGJONÂL
PE LENGHE
FURLANE
^^

